


ML
336
L44
1726
v.1





Digitized by the Internet Archive
in 2021 with funding from
University of Toronto



古樂經傳目錄

卷之一

樂經

卷之二

樂記

卷之三

附樂經

卷之四

附樂記

聲律篇

卷之五

附樂記二

樂教篇
樂用篇

右古樂經傳凡五卷先大夫文貞公之遺橐也
公年十七卽講律呂之學慨樂書之有闕中歲
嘗彙次經傳子史諸書釐爲八篇曰樂理樂教
樂章樂律樂器樂聲樂舞樂用而各爲之解乙
酉春燬於火比戊子秋夏訂篇目据依經傳旁
羅羣籍先就橐若干帙期於次第賡續以酬風

志恭惟

聖祖皇帝天縱生知好古敏求逮耄齡而愈篤其時
方修明四府以惠教萬世又綜七畧之精縕道
數兼該歸于一貫律呂則

親授侍臣纂成正義闡制作之秘要於古未之有也
先公頻承

聖訓於黃鐘真度隔八相應綫體比例不同之理深
有領受於是歎觀海者難爲水輟不復續獨以
爲旣就橐者於古樂書字語之隱奧難明與錯
互不可解者具有詮釋足爲學徒蒐討之助存

在箱篋惟樂經樂記及附記之聲律篇經公手

定餘則散而未哀丙午

清植

與王君振聲搜尋

舊帙念先公手澤罔敢失墜乃推本遺指以引

經者附之經引史傳子集者附於聲律篇之後

別爲一卷王君與繆君湘芷割清俸鑱之梨棗

陳君對初任其校讐丁未長至工既竣敬紀

末於後覽者知是編之意所以爲古書之解

而非作也孫

清植

謹識

樂經

安溪李光地註

漢書文帝時得魏文侯樂工竇公年一百八十歲
出其本經一篇卽今周官大司樂章則知此篇乃
古樂經也

大司樂中大夫二人樂師下大夫四人上士八人下
士十有六人府四人史八人胥八人徒八十人

大司樂掌成均之法以治建國之學政而合國之子
弟焉凡有道者有德者使教焉死則以爲樂祖祭於
瞽宗以樂德教國子中和祇庸孝友以樂語教國子

興道諷誦言語以樂舞教國子舞雲門大卷大咸大磬大夏大濩大武

成均五帝之學名也周人兼立四代之學其所以教則皆古者之遺法故舉成均爲尊而大司樂掌焉其法則下文樂德樂語樂舞之類是也國之子弟公卿大夫之子弟也瞽宗殷學也立師教之死而祀之於學所謂釋菜於先師者也祇敬也庸常也體中達和所謂至德也敬業有常所謂敏德也仁孝友悌所謂孝德也此養士之本故與師氏之

教同興者以物興懷道者自述其意所謂詩言志者也倍文曰諷以聲節之曰誦所謂歌永言者也發端曰言答述曰語所謂君子於是語於是道古者也雲門以下黃帝至周列代之樂也蓋樂德則以理義養其心樂語則以聲音養其耳樂舞則以舞蹈養其血脈古人所謂以樂教者以此

以六律六同五聲八音六舞大合樂以致鬼神示以和邦國以諧萬民以安賓客以說遠人以作動物大合樂乃肄習於學之事以致鬼神示以下則推

言其用之之效蓋用樂多端各從類應非專主一事而言也六律陽律也六同陰律也律以爲聲之和聲以爲音之綱音以爲舞之節作樂本末其序如此用之祭祀則鬼神示以致用之邦國則邦國以和用之鄉黨閭巷則萬民以諧用之饗燕之屬則賓客以安遠人以說至於凡有血氣能動之者莫不興起其序以自尊而卑自近而遠也○案六司樂卽尚書典樂之職國之子弟卽冑子也六德卽直溫寬栗之類異其文耳興道諷誦言語于是

乎有詩歌然後以聲依之以律和之播之以音動
之以舞而樂之用廣矣所謂神人以和者也然則
樂者蓋先王之所以教而因推之於宗廟朝廷邦
國以和神人書禮所稱其致一也後世不知樂爲
教之具故其職領於有司而已學士先生鮮有知
者其精微之旨不傳而徒索之鏗鏘節奏以庶幾
和神人之治亦不可得已

乃分樂而序之以祭以享以祀

自此以下皆用樂之事也祭者地元享者人鬼祀

者天神

乃奏黃鐘歌大呂舞雲門以祀天神

上言祭享祀三事而此下乃有六樂者蓋有祀日月星辰不繫於天祭嶽瀆山川不繫於地特祠闕宮分享羣廟之時也然其曰祀曰祭曰享則仍蒙上文其實三事而已凡陽律言奏陰律言歌者陽律則尚陰而樂器陰也陰律則尚陽而人聲陽也陰陽和而後樂成也祀天之樂以陽律爲重天主生物之始故用黃鐘陽生之律而合以陰之大呂

也

乃奏大簇歌應鐘舞咸池以祭地示
祭地之樂以陰律爲重地主成物之終故用應鐘
陰成之律而從陽之大簇也

乃奏姑洗歌南呂舞大磬以祀四望

四望之義不一此所指則日月星辰也四望以成
天之功故用姑洗陽成之律而合以陰之南呂也
乃奏蕤賓歌函鐘舞大夏以祭山川

山川代地生物故用函鐘陰生之律而從陽之蕤

賓也

乃奏夷則歌小呂舞大濩以享先妣

周特尊祀姜嫄故妣先於祖人道陰陽參焉但以生物終始爲義而已妣主育養自己至申萬物致養故用夷則小呂之合律也

乃奏無射歌夾鐘舞大武以享先祖

祖主生成自卯至戌萬物形就故用無射夾鐘之合律也六樂用律與舞蓋以尊卑爲次然於陰陽

象類各有合者又如此○又案合辰之說以建

交會左右相逢然天運日行既有歲差則今不與古合矣蓋星日有差而氣候之溫寒晷刻之長短則不差也今子月與五月寅月與亥月氣候晷刻莫不相似可知合辰之理萬古不易也

凡六樂者文之以五聲播之以八音

凡樂之所謂五聲者有調有音調則全樂而名之如曰宮調曰商調者是已音則逐字而命之如曰宮音曰商音者是已前六樂十二律者皆不言是何調理應皆爲宮也至此節云文之以五聲乃是

調中之五聲。爾凡其律雖爲主以名調。然中間和應之律五聲具備。此凡樂之大綱也。

凡六樂者一變而致羽物及川澤之元。再變而致蟲物及山林之元。三變而致鱗物及丘陵之元。四變而致毛物及墳衍之元。五變而致介物及土之元。六變而致象物及天神。

變猶更也。樂稍歇則更奏。故曰一成亦曰一變。此一條承上而論爲樂感召之理。以起下六變八變。

九變之端也。人鬼神元百物莫不有感召之理焉。

物輕清得氣之先其次則羸物爲其近於人也
其次則鱗次毛次介以動靜之性爲別也川澤之
藪大山林之氣疏其次丘陵次墳衍次土示以氣
之通塞爲敘也象物卽日月星辰之屬在天成象
者也天神卽上下文所祀之天神也六變而致此
故下云天神皆降可得而禮也由是而八變以興
地示由是而九變以來入鬼此不究言之者緣下
有其文則此固可省也○注家以此六變爲大蜡
之樂特因上下各言鬼神示之祀中間乃及百物

緣文生義爲此說爾。無所據也。夫大蜡而用樂則有之矣。其索物而致之感通之理當與此同。然考之經則祭蜡而飲豳頌擊土鼓以息老物。蓋籥章氏之掌非大司樂之司也。且經文上蒙六樂故知是預言樂理。非指蜡祭其及于百物者。因此與下節皆論鬼神示之感而邦國萬民賓客遠人之屬乃是同類感應易曉。故言此以備作動物之意。猶虞書旣言神人以和而必終之以百獸率舞者爾。非自爲一事也。

凡樂圖鐘爲宮

當作黃鐘

黃鐘爲角大簇爲徵姑洗爲羽

雷鼓雷鼓孤竹之管雲和之琴瑟雲門之舞冬日

於地上之圖止奏之若樂六變則天神皆降可得而

禮矣凡樂函鍾爲宮大簇爲角姑洗爲徵南呂爲羽

靈鼓靈鼗孫竹之管空桑之琴瑟咸池之舞夏日

於澤中之方止奏之若樂八變則地祇皆出可得而

禮矣凡樂黃鐘爲宮

當作圓鐘

大呂爲角大簇爲徵應鐘

爲羽路鼓路鼓陰竹之管龍門之琴瑟九德之歌九

考之舞於宗廟之中奏之若樂九變則人鬼可得而

禮矣

上六樂者用以祀祭享各有二焉此則合二者而
一之蓋陽生而郊天配以日月星辰陰生而祭地
配以嶽瀆山川大禘大祫有事大廟配以羣后之
時也其所分以祀以祭以享之律則與前文同但
黃鐘圓鐘兩字錯互諸儒相承遂不復正原其所
以蓋以黃鐘一律宮角兩用或者疑其重複而以
意易之致誤之根當緣於此不知黃鐘爲宮則黃
鐘宮調也其起調畢曲之律卽以黃鐘黃鐘爲角

則黃鐘角調也。其起調畢曲之律。則以姑洗太簇爲徵。則太簇徵調也。其起調畢曲之律。則以南呂姑洗爲羽。則姑洗羽調也。其起調畢曲之律。則以大呂此四律者。皆前所祀天神四望之樂。故此大祀則合而用之。至下二樂。莫不皆然。但祭祀之大者。廢商。故調止於四。而地樂中有太簇。本黃鐘之商聲。人樂中有無射。乃西方之窮律。緣去商調之義。故此二律有應爲起調畢曲者。則并去之。蓋麋賓與大簇同類。南呂與無射同方。故其樂可以相

也。至於三宮之義，應乎三始子。天氣之始也。午地氣之始也。卯人事之始也。然午者正陽之位，故地始於未。義既如此，氣亦相應。冬至祀天，則黃鐘之月也。夏至祭地，則林鐘之合也。揆以春禘之文，則夾鐘之月也。此三宮所以爲樂之本，不可移易其餘三調之次，乃各以六律五聲之序求之，則當之者，各其調也。音有八，而用止於革絲竹者，鼓鼗以命管，琴瑟以升歌，皆舉其重者言。六代之舞，在天則統以天神之所用，在地則統以地元之所用。

不廟則亦以古爲尊故舍近而用大磬焉其三樂
之變數多寡不同者天動而地靜動者速靜者遲
神示伸而人鬼屈伸者易求屈者難致也然上六
變者山林川澤丘陵墳衍土示皆已畢至而此謂
樂八變地示乃出者前之所致山川之類爾經別
地示於山川而所謂土示者原隰之稱非地示也
故以此三樂而通上文之說則自一至九樂之每
變所感愈遠作樂者各以所欲致而求之則凡在
天地之間者幽明上下無不以其類至此樂之成

也

八樂事

包下祭祀饗射侑食愷獻之類

大祭祀宿縣遂以聲展之王出入則令奏王夏尸出入則令奏肆夏牲出入則令奏昭夏帥國子而舞

大祭祀卽上天神地示人鬼之祀也宿縣謂前宿而豫縣之展者陳其聲而省聽之也王夏肆夏昭夏樂章之名九夏之三也祭祀用樂旣詳前文故此但言豫期展省之事及正樂之外有此三夏以

贊出入而已樂之諸工各有所屬而國子六舞者
大司樂所以教故又特言之

大饗不入牲其他皆如祭祀

大饗饗賓客也不入牲則不奏昭夏但王出入賓
出入奏王夏肆夏而已其宿縣展聲命舞亦與祭
祀同也○祀祭享各有所用聲律賓饗不言者其
類至多因所宜而用之篇章既異聲律亦殊不可
槩定也

大射王出入令奏王夏及射令奏騶虞詔諸侯以弓

天舞

騶虞樂章名王射以騶虞爲節也舞謂執弓挾矢揖讓進退之儀

王大食三侑皆令奏鐘鼓

大食朔月月半也常日亦以樂侑食而不奏鐘鼓王師大獻則令奏愷樂

大獻獻捷於祖也愷樂獻功之樂也趙商問於鄭

康成云大司馬師有功則愷樂獻於社大司樂注

云獻捷于祖未達異意答曰司馬以軍之功故獻

於社大司樂宗伯之屬主於宗廟之禮故獻于
也

凡日月食四鎮五嶽崩大傀異哉諸侯薨令去樂大
札大凶大哉大臣死凡國之大憂令弛縣

傀猶怪也大怪異哉若星辰奔竇及震裂爲害者
札疫厲也凶凶年也大哉水火也大臣王朝之大
臣也大憂敗軍亡將之類也去樂者不作樂也弛
縣者釋下其器也弛縣亦去樂而弛縣蓋久矣

凡建國禁其淫聲過聲凶聲慢聲

國諸侯之國也。政教有得失，風俗有邪正，則聲音異矣。蓋太師陳列國之詩以觀民風，則大司樂因而禁之也。淫者，軼於禮之謂；樂之蕩也，鄭衛之聲是也。過謂過其節，如憂而至於傷儉而至於嗇，唐魏之聲是也。凶者，惡逆之聲，如北鄙殺伐是也。慢者，暴慢之聲，如傲僻喬志是也。此四者，喜怒哀樂之偏，本乎人情，流於風俗者也。政教善，則人得其性情之正，而又以和聲感之，故風移而俗易矣。○又按大司樂所職，王朝之樂也，鄉三物六藝之教。

畿內民庶之樂也。至於九州列國。習尚者好不同。聲音言語不通。雖王道之行。四達不悖。然大司樂亦禁其淫過。凶慢而已。所謂修其教。不易其俗。使之樂其所自生。不忘其所本。蓋禮樂之善經也。推此而論。則後世之樂。亦豈必一一合於古哉。就其時俗之所宜。而去其所爲導淫增悲者。固足以興人心之善。成化中之理。殷天地之和。是則孟氏所謂今之樂。由古之樂者。舉而措之。存乎其人而已。大喪。蒞廡樂器。及葬。藏樂器。亦如之。

卷之一
十一
盛興也。謂作之也。蓋以爲明器之用。故葬則藏之
穴中。凡言令言帥言泄者。其職尊也。

樂師掌國學之政。以教國子。小舞。凡舞有帔舞。有羽
舞。有皇舞。有旄舞。有干舞。有人舞。

樂師貳大司樂者。大司樂所教六代之舞。成人所
舞也。此小舞。謂幼小時所舞者。內則曰。十三舞勺。
成童舞象。二十舞大夏。然則自成童以前。皆小舞
也。大夏者。前六舞之一。二十而舞此。則其餘以次
徧舞之。可知。帔。析五采繒羽者。析羽。皇。雜五采羽。

如鳳皇色旄者黿牛之尾干者兵舞人者手舞此
包大小舞而言也

敎樂儀行以肆夏趨以采薺車亦如之環拜以鐘鼓
爲節凡射王以騶虞爲節諸侯以貍首爲節大夫以
采蘋爲節士以采蘩爲節

此所敎者自王以下非國子也樂儀凡行趨登車
環拜及射其節應乎樂者皆是也肆夏采薺皆樂
章名爾雅曰堂上謂之行門外謂之趨然則王出
至堂而肆夏作出路門而采薺作其反亦如之此

謂步迎賓客如以車出入則亦如之也環旋也周旋拜跪節以鐘鼓也騶虞見大司樂狸首采蘋采繁皆樂章名

凡樂掌其序事治其樂政

凡下祭饗射獻之事也序事者陳列之次序樂政者作樂之政令

凡國之小事用樂者令奏鐘鼓

小事小祭祀之事也大祭祀以鐘鼓奏九夏則大司樂令之

凡樂成則告備詔來瞽臯舞

此節先鄭以瞽爲鼓謂呼擊鼓者與舞偕來也後鄭仍字謂詔眡瞭扶瞽者來入也愚謂瞽工升歌樂之初事此言於告備之後則疑先鄭之說爲長臯號告也使鼓來而告當舞者此鼓蓋所以節舞也按尚書簡韶九成舜樂之終記言升歌清廟下而管象然後舞作則知凡舞皆在合樂之時故於告備之後言之

及徹帥學士而歌徹

命相

食諸侯序其樂事令奏鐘鼓令相如祭之儀

饗食殺於大饗者也。令奏鐘鼓令相而無來鼓。皇

舞歌徹之事則知饗食之禮止於小祭祀矣

燕射帥射夫以弓矢舞

燕射殺於大射者也射夫衆耦也大司樂詔諸侯
樂師則帥射夫

樂出入令奏鐘鼓

兼上祭祀饗射而言也大司樂於王與屍賓及牲
出入令奏夏樂而已樂出入則無文故樂師令之
但言鐘鼓者皆殺九夏也

人車大獻教愷歌遂倡之

十司樂言王師大獻者王自行也此言凡軍則命將帥皆包之預教愷樂之歌而遂倡其端也

凡喪陳樂器則帥樂官及序哭亦如之

言凡喪亦不止大喪也樂器明器也帥樂官者往陳樂器也序哭謂入壙序哭之時

凡樂官掌其政令聽其治訟

樂官自大胥以下至於司干之屬皆是

大胥中士四人小胥下士八人府二人史四人徒四

人

大胥掌學士之版以待致諸子春入學舍采合舞而
頒學合聲以六樂之會正舞位以序出入舞者

胥有才智之稱大胥小胥皆與樂師佐大司樂而
經紀學政者學士卽諸子也自隸於學則曰學士
自出於國則曰諸子諸子及年然後入學故待而
致之而掌其版也舍采釋菜也蓋祭樂祖於瞽宗
因而合舞也頒學者頒其所習之業因而合聲也
合者齊其綴兆均其節奏之謂下但言正舞位不
言聲者按月令仲春命樂正習舞釋菜季春大合

樂故鄭氏以大樂之會爲大合樂之事也蓋習之
經月又大會而正其位使出而舞者舞罷而入者
無不以其序焉然此合樂者教舞而已至大司樂
以六律五聲八音六舞大合樂則聲音齊奏歌舞
畢陳視此爲備然則大胥必先期序正以待大司
樂之陳肄非兩事也

比樂官展樂器

比技也展省也以上教國子之事此則兼及大師
以下之官皆所以待合樂而爲有事之用也

禮之用樂者以鼓徵學士

人胥擊鼓以召之樂師告當舞者而大司樂帥以舞焉

宮中之事

兼序宮中之事其意深矣商書曰敢有恒舞于宮酣歌于室此所以大爲之坊也

小胥掌學士之徵令而比之觶其不敬者巡舞列而違其怠慢者

不敬謂慢期不時至也觶罰爵也

正樂縣之位。王宮縣。諸侯軒縣。卿諸侯判縣。士特縣。辨其聲。凡縣鐘磬。半爲堵。全爲肆。

樂縣謂鐘磬之屬懸於筍簾者。宮縣如宮牆然。四面懸也。軒縣如軒車然。三面懸也。判縣東西懸也。特縣一面懸也。旣正其位。又因而辨其聲也。凡鐘磬編懸之。二八十六枚。而在一簾謂之堵。鐘一堵。磬一堵。謂之肆。此所謂縣者。皆肆也。若諸侯之卿大夫。半天子之卿大夫。西懸鐘。東懸磬。士亦半天子之士。則懸磬而已。所謂堵也。自大司樂樂師及

大小胥皆以教爲職。而凡樂之政令綱紀掌焉。若
太師以下則無與於國學之政所司者。聲音之事
器數之守所教者。其屬而已。此周官先後之序也。
大師下大夫二人。小師上士四人。瞽矇上瞽四十人。
中瞽百人。下瞽百有六十人。眡瞭三百人。府四人。史
八人。胥十有二人。徒百有二十人。

大師掌六律六同以合陰陽之聲。陽聲黃鐘大簇姑
洗蕤賓夷則無射。陰聲大呂應鐘南呂函鐘小呂夾
鍾皆文之以五聲。宮商角徵羽皆播之以八音。金石

革絲木匏竹

六律五聲八音大司樂既言之蓋大司樂總其事而序其用大師則專其職而辨其聲也凡陽律自子左旋以終於戌陰律自丑右轉以終於卯左右相配謂之合律其理見大司樂分紀中十二律皆有五聲而旋相爲宮有調有音調則云某宮調某商調而盡於六十音則各用其爲調之律所轉生之聲加以變宮變徵而窮於八十四所謂文之以五聲也金鐘鎛也石磬也土塤也革鼓鼗也絲琴

也木祝敔也匏笙也竹管簫也金石以紀律
之綱也琴瑟以應人聲在堂上笙管塤貴人氣在
堂下樂之用也鼓鼗祝敔所以節樂而已故序其
輕重之次則曰金石絲竹匏土革木國語伶州鳩
所言是也此則以成於天地者爲貴故先以金石
土成於動物者次之故繼以革絲成於植物者又
次之故繼以木匏竹也所謂播之以八音也
教六詩曰風曰賦曰比曰興曰雅曰頌以六德爲之
本以六律爲之音

風雅頌詩之三部也。賦比興詩之三體也。詩始於
風。故首風有風而賦。比興具矣。故次以賦比興而
後曰雅曰頌也。六德中和祇庸孝友也。詩以言志
故必以六德爲之本。歌以詠之聲以依之故以六
律爲之音也。虞典先言詩後言聲律者。教胄子之
事。辨志爲要也。此先言聲律後言詩者。教瞽矇之
事。審音爲重也。○或疑瞽矇賤工不當以六德爲
教。夫欲使之歌詩奏樂以和神人而乃以其藝賤
之使之不知其意不平其心精粗本末判然兩途

此後世禮樂所以崩壞也以是而說三代之制誤矣

大祭祀帥瞽登歌令奏擊拊下管播樂器令奏鼓鞀大簫亦如之

帥瞽登堂而歌將歌之時則令奏擊拊乃歌也下堂下也堂下之樂以管爲主而樂器從之下管之時樂器旣播亦令奏鼓鞀管乃作也擊拊者或當擊或當拊鞀小鼓也按虞書曰戛擊鳴球搏拊琴瑟以詠下管鼗鼓其文政與此合然其下有笙鏞

以閒則閒歌也。簫韶九成則合樂也。儀禮雖鄉樂亦有升歌笙入閒歌合樂之四節。則此大祭祀其備四樂可知。然經不言者。蓋閒則歌管之迭作。合則歌管之並興而已。故言登歌下管足以該之也。

大射帥瞽而歌射節

大司樂令奏大師則帥瞽而歌之

大師執同律以聽軍聲而詔吉凶

大師大軍旅之事也。史記武王伐紂吹律聽聲春

秋傳師曠曰南風不競楚必無功此皆以律聽聲

而知吉凶者也

大喪帥瞽而獻作匱諡

匱柩也按王之諡稱天以誅則非大師所可作也
蓋帥瞽而歌述其平生行迹以興起其作諡之事
耳

凡國之瞽矇正焉

明大師之所屬

小師掌教鼓鼗祝敔塤簫管弦歌

教教瞽矇也鼓鼗祝敔所以節樂也塤簫管堂下

之樂也。弦歌堂上之樂也。教人習業者。自粗而精。故其序如此。其無金石與匏者。以下磬師。鐘師。笙師。搏師。各有專掌也。

大祭祀登歌擊拊。下管擊應鼓。徹歌大饗亦如之。

大師令奏擊拊。則小師擊拊。大師令奏鼓。轅則小師擊應鼓也。應轅皆小鼓。徹而歌。雍蓋與學士竝歌之。

大喪與廞。

與於廞作匱諡之事。

八八八八小樂事鼓棟

小事無登歌之事者則鼓棟而已

掌六樂聲音之節與其和

六樂卽大司樂分序之六樂節者六律五聲之節
度和者六律五聲之諧和也

瞽矇掌播鼗祝敔塤簫管弦歌

皆小師之所以教者而瞽矇衆習焉

諷誦詩世奠繫鼓琴瑟

奠繫謂前代一定之譜系也此謂人君燕居之時

則諷誦詩章。又世次歷代之莫繫以戒勸之復鼓琴瑟以女樂之也。國語曰。瞽賦矇誦。又曰。教之世而爲之。明明德而廢幽昏焉。以忾懼其動。

掌九德六詩之歌。以役大師。

九德。大司樂所謂九德之歌者。古樂也。六詩。大師之六詩。今樂也。

矇矚掌凡樂事。播鼗擊頌磬笙磬。

言凡樂事。於樂作之時。則播鼗。而又擊其頌磬笙。

磬也。頌卽庸也。與歌聲相應者。曰頌磬。頌鐘與笙。

書曰笙磬笙鐘皆於樂既作而奏之故
則磬師之屬擊之

掌大師之縣

縣之使得其位

凡樂事相瞽

扶相樂出入行坐

大喪飲樂大旅亦如之

此所廢者蓋鼗祝敔塤簫管琴瑟之類凡瞽矇所

掌者皆眡瞭代厥之然眡瞭之職既云擊頌磬笙
磬又云掌大師之縣則編鐘編磬亦必眡瞭厥之
也故下磬師無鼗器之文而此不云厥其樂器但
云厥樂器以包之又自笙師以下皆曰奉而藏之
此不言者眡瞭非士奉樂器而藏於墓非士不可
親也意此之所厥皆笙師奉藏之器故惟此與笙
師有大旅之文其器多故也其餘各厥一器者則
不復舉大旅旅非常祭故亦於時興造樂器也

賁射皆奏其鐘鼓鼗愷獻亦如之

事亦皆眡瞭掌之

典同中士二人府一人史一人胥二人徒二十人
典同掌六律六同之和以辨天地四方陰陽之聲以
爲樂器

有律有同獨言典同律同可互舉也六律爲陽六
同爲陰陽者從天陰者從地應十二月之氣以順
四時故能知律同之和則可以辨天地四方陰陽
之聲矣樂器金石之類造樂器必本於律也

聲硯正聲緩下聲肆陂聲散險聲斂達聲羸
回聲衍侈聲笮奔聲鬱薄聲甄厚聲石

聲鏗然清也黯暗也笮暴疾也奔如奔蓋不
舒也甄讀如震掉也高謂聲高也高則鏗鎗正謂
聲平正也正則和緩下謂聲下也下則弘肆此三
者聲之正也其餘則皆聲之病也然其諸病亦由
三者推之陂險皆正之反陂者聲不正也險者聲
不平也不正則氣不根於內而散不平則氣不達
於外而斂此二者正聲所以失之原也太高而四

達其過則盈溢太下而沈微或紆回其失則暗昧而衍餘達之甚而侈放則暴疾而不蓄回之甚而弇掩則鬱抑而不舒高而薄則至於掉而不收下而厚則至於如石而無韻二者幾於不成聲矣此七者皆高下之過必去其病然後清濁適均可與正聲相宣而諧和也按鄭氏專指鐘之一器而言其理蓋亦相通然所謂高下陂險達微之類皆以鐘形爲說則字義多有難解且於下文凡爲樂器與和樂之義爲不合耳

爲樂器以十有二律爲之數度以十有二聲爲之

以十有二律爲之數度如黃鐘管長九寸則倍之
又加半總二尺二寸半以爲鐘口之徑十九寸爲
九尺半之以爲琴長之類是也十有二聲卽上高
聲磬之十二聲也以器寫聲以聲製器然後諧和
凡和樂亦如之

器旣均調矣至和樂之時則其擊拊鼓吹輕重疾
徐之節亦必以十二聲劑量之然後樂乃和也

磬師中士四人下士八人府四人史二人胥四人徒四十人

磬師掌教擊磬擊編鐘

教者雜教其屬及眡瞭也磬亦編獨於鐘言之鐘有不編者也作樂之時眡瞭擊磬磬師之屬擊鐘不編之鐘則鐘師擊之

教縵樂燕樂之鐘磬

鄭氏曰縵謂雜聲之和樂者學記曰不學操縵不能安弦是也燕樂房中之樂也○愚案先王之世

自大司樂以下瞽矇眡瞭以上所掌者固無非雅
正之音和神人之樂矣然於雜弄之調燕私之曲
未嘗不兼收存肄而時出而用之所以周物理而
盡人情其誘人也易其入人也深但皆領之樂官
俾無流放淫僻而已故班固曰今漢郊廟詩歌未
有祖宗之事八音調均又不協於鐘律而內有掖
庭材人外有上林樂府皆以鄭聲施於朝廷蓋言
雅樂不興燕樂雜樂亦不正也自時厥後太常教
坊別爲二事學士恥言俗樂而姦聲日以轉盛使

其有典領之官肄習訂正豈有此失哉

凡祭祀奏縵樂。

樂則鐘師奏之也。但縵樂惟用之祭祀燕樂則祭祀饗食皆用之。

鐘師中士四人下士八人府二人史二人胥六人徒六十人。

鐘師掌金奏凡樂事以鐘鼓奏九夏。王夏肆夏昭夏納夏章夏齊夏族夏械夏鰲夏。

金謂大鐘及鐸不編者也。鐸比大鐘爲小。比編鐘。

則大也。金奏擊此鐘。鐘以爲奏樂之節也。鐘師擊
鐘。鐃。鐃。師擊鼓。九夏者。杜子春云。王出入奏王夏。
尸出入奏肆夏。牲出入奏昭夏。四方賓來奏納夏。
臣有功奏章夏。夫人祭奏齊夏。族人侍奏族夏。客
醉而出奏醵夏。公出入奏醵夏。按杜鄭皆以九夏
爲詩篇名。愚謂言歌又言奏者。則有詩篇下騶虞
貍首采蘋采芣是也。言奏不言歌者。則但如笙吹
之類。而無詩篇九夏是也。杜鄭但以春秋傳肆夏
文王鹿鳴竝舉。故斷爲詩頌。然旣別言金奏工歌。

則二樂固有分矣

凡祭祀饗食奏燕樂

凡射王奏騶虞諸侯奏貍首卿大夫奏采士奏雲
縶

四樂者大師帥瞽而歌之鐘師則以鐘鼓應之
掌鼗鼓縶樂

磬師奏縶樂鐘師則以鼗而鼓之使作

笙師中士二人下士四人府二人史二人胥一人徒

十人

三師掌教。敎竽笙埙簫簫篪篴管。

埙簫管者。小師所敎。瞽矇所習。眡瞭所廢。今笙師亦敎焉。則是與小師雜敎之下。所廢樂器亦是與眡瞭雜廢之也。其奉而藏之者。蓋并眡瞭所廢而奉藏之。故眡瞭無藏器之文。

春牘應雅。以敎械樂。

牘應雅三器也。上八器者。則吹之。此三器則春之。春謂以築地春此三器。專爲械樂之用。賓醉而出。奏械夏築此三器於庭。以爲奏樂之節也。

軍夜謂行軍之夜三鼙者初昏夜半旦明也守
備守之鼓

大喪廡其樂器奉而藏之

此所廡藏謂鐃鼓并大鐘也故鐘師無文

韎師下士二人府一人史一人舞者十有六人徒四
十人

韎師掌教韎樂祭祀則帥其屬而舞之大饗亦如之
韎東夷之樂也東夷之俗於三方爲美則其樂亦
於諸夷爲優故其官特稱師而祭祀大饗皆舞之

不與諸方同也

旌人下士四人舞者衆寡無數府二人史二人胥二人徒二十人

旌人掌教舞散樂舞夷樂

散樂列國之樂也夷樂雜居中國夷狄之樂也所以知者以下文掌四方之舞仕者而又不言四夷則非遠裔可知

凡四方之以舞仕者屬焉凡祭祀賓客舞其燕樂

不言大饗又但於奏燕樂之時舞之則殺於燕樂

矣

籥師中士四人府二人史二人胥二人徒二十人

籥師掌教國子舞羽敝籥

持羽吹籥文舞也按文王世子小學正教于大胥
贊之籥師教戈籥師丞贊之是籥師未嘗不教戈
舞也此不言者以文舞統之重文德也○又按樂
師所教有六舞而此唯言羽舞蓋皇亦羽之類而
既兼戈舞則干帔亦當兼之樂師總其事籥師專
其職爾惟旄舞則意是旄人所掌人舞則意是韎

師所掌蓋皆夷舞也故司徒舞人四舞獨無旄舞人舞者以此與

祭祀則鼓羽籥之舞賓客饗食則亦如之

國子舞羽則籥師鼓之○按書傳言干戚之舞不一此言祭祀獨鼓羽籥之舞不及干者蓋朱干玉戚惟施於大武之樂而已其餘諸舞皆不用也大武之舞總干山立遲而又久卒以皆坐復綴終焉故孔子極言其偃武修文之事以曉牟賈則雖干舞亦以羽舞槩之此與大祭不用商聲之意正同

樂記賓牟賈一節聲舞答問可與周官相發明也
大喪廡其樂器奉而藏之

此所廡惟羽籥而已。○按聲之後則及於舞故鐃
師之次則以鞀師旋人籥師繼之然夷舞散舞先
於國子之舞者示四方歸化爲文德所懷也

籥章中士二人下士四人府一人史一人胥二人徒
二十人

籥章掌土鼓鹵籥

土鼓築土爲鼓上古之樂也鹵籥吹籥之聲章鹵

人之樂也

力盡苦擊土鼓歛爾詩以逆暑中秋夜迎寒亦如之
爾詩爾風之七月也

凡國祈年于田祖歛爾雅擊土鼓以樂田畯國祭蜡
則歛爾頌擊土鼓以息老物

田祖神農也田畯古之始耕田者農夫也蜡者歲
十二月合聚萬物而索饗之也萬物助天以成歲
事至此爲其老而勞乃祀而息養之於是國亦養
老焉蓋建亥之月月令孟冬勞農以休息之是也

豳風頌先儒或破七月之詩當之朱子以爲
之甫田大田頌之載芟良耜或其類也然不可考
矣迎寒暑則先擊鼓尊天氣也故先上古之樂祈
年祭蜡則先吹籥重農事也故先豳人之樂也○
按豳諸侯之國以其爲受命之基故不可夷於列
國之樂而特以籥章掌之其用之必於田事者后
稷以來世勤稼穡王業所肇用之歲事不忘本也
然宗廟之中列國四夷之樂莫不陳而觀焉豳風
王者之本獨不陳之者以其非王者之樂故不可

與韶夏濩武等若與燕樂變樂散樂夷樂混而陳
之又非所以尊祖宗之德推受命之符也用之以
與上古之樂配其旨遠矣

鞀鞀氏下士四人府一人史一人胥二人徒二十人
鞀鞀氏掌四夷之樂與其聲歌祭祀則敔而歌之燕
亦如之

曰四夷者方外四裔之夷也樂謂其所用之器也
此視旄人所掌之夷又加遠矣故其舞容或鄙怪
而不足觀存其樂器聲歌所以通遠俗示無外也

然執師用之大饗旌人用之賓客此則曰燕而已
以是而推其所用之祭祀亦當有等也

典庸器下士四人府四人史二人胥八人徒八十人
典庸器掌藏樂器庸器

罇師以上樂器各有所司而典庸器竝藏之庸器
伐國所獲之器存以示子孫者官以典庸器爲名
重其器也文以藏樂器爲先蓋大司樂之屬

及祭祀帥其屬而設筍簋陳庸器饗食賓射亦如之
眡瞭將懸樂器則爲設筍簋以待之庸器亦陳之

者所以告功昭德惕子孫示臣下也

大喪獻筍簠

不言藏者筍簠不藏也記曰有鐘磬而無筍簠

司干下士二人府二人史二人徒二十人

司干掌舞器

舞器兼羽籥干戚之類籥師之教則槩以羽修文
事也司干所藏則槩以干存武備也文則修之武
則備之周公名官之意也

祭祀舞者既陳則授舞器既舞則受之賓饗亦如之

言振集器則非一器可知

大喪廡舞器及葬奉而藏之

除羽是籥師所廡餘舞器皆司干廡之凡所職廡
廡一器者則不言葬因其少畧之也應廡多器者
則下必言葬因其多詳之也

右凡樂職二十自大司樂至小胥皆以學校之教
爲職而掌樂之政令焉自大師至眡瞭則專于聲
樂之事故次之典同本律呂審聲音以造樂器故
又次之樂器之司自磬師至鐃師備矣故又次之

有聲必有舞故韎師旄人箚師又次之籥章鞀鞀
氏或爲上古先世之樂或爲外方遠裔之音故又
次之典庸器聲器也司干舞器也皆藏器以待事
而已故又次之凡散見書傳如樂正司業父師司
成之類乃異代之制而雜出他官若鼓人舞人鼂
氏鞀人磬人梓人之屬則各執藝事以役於此者
也

辯證

圓鐘爲宮以下說異於古何也曰調與聲不同從

來說者皆未別明聲調是以特就經上之律起意而不復以前文參考。且以黃鐘之五調論則所謂黃鐘宮調者用黃鐘所生之七律而以黃鐘起調黃鐘畢曲也所謂黃鐘商調黃鐘角調黃鐘徵調黃鐘羽調者則亦用黃鐘所生之七律而或以太簇或以姑洗或以林鐘南呂起調畢曲也所以然者黃鐘以太簇爲商以姑洗爲角以林鐘爲徵以南呂爲羽如此節用黃鐘爲角調則必以其所生之角聲起調畢曲自然之理也故如黃鐘之爲

角聲也則必曰夷則角而不曰黃鍾角如太簇之
爲徵聲也則必曰林鍾徵而不曰太簇徵如姑洗
之爲羽聲也則必曰林鍾羽而不曰姑洗羽漢魏
以來樂部未之有改然則黃鍾爲角之爲角調而
用姑洗太簇爲徵之爲徵調而用南呂姑洗爲羽
之爲羽調而用大呂無疑也攷禮運雖有旋相爲
宮之言然竝未著其然則六經中大樂聲調之
理惟周官此文爲可拈爾況其證之前文又相
合則聖人之微辭奧義殆未易以曲說通也

而下爲說頗多。其中亦有推論巧合如沈氏筆談之云者。然終於聲調之理無當。故不敢從。

其易圖鐘黃鐘也。何據曰。案班氏律志。黃鐘爲天統。林鐘爲地統。太簇爲人統。則黃鐘當爲天宮。林鐘當爲地宮。明矣。故前文亦以黃鐘祀天。林鐘祭地也。太簇雖屬人統。然前文旣與應鐘合而爲祭地之樂。則施之宗廟之宮。義有未允。而來鐘者。前文所用以享于先祖者也。蓋天氣始於子。地氣始於午。人事始於卯。有陰陽晝夜之正也。地退一位。

而始於未則避南方之正陽也。人進一位而始於寅則重民事之蚤作也。然則宗廟之祭以圓鐘爲宮。旣合享祖之文。又著人事之始。比於援引星辰捨經證緯不亦善乎。漢書郊祀志蓋仍此誤。至唐祖孝孫以黃鐘祀天。林鐘祭地。乃爲能復古者。獨其以太簇享廟。則但據三統之義而未知周官之有互文爲少失爾。

商調之避他書亦有足徵者。與曰孔子謂賓牟賈

曰聲淫及商何也。曰非武聲也有司失其傳也。孔

子曰唯某之間諸葛弘亦若吾子之言是也

周

成解此爲有貪商天下之心揆之文義爲不類按
國語武王以夷則之上宮畢陣以黃鐘之下宮布
戎以太簇之下宮布令於殷以無射之上宮施舍
百姓史記亦云武王伐紂吹律聽聲殺氣相并而
音尚宮然則大武之樂蓋尚宮聲而末流之失其
音節乃有濫入於商者故曰聲淫及商猶所謂歲
在星紀淫於元枵者云爾非貪商天下之謂也夫
大武之樂以武功著然於商聲猶不用況此三祭

所奏者雲門咸池大韶之舞則其去商調也何疑
其爲緣此之義於太簇無射二律有應爲起調畢
曲者則并云之又何据也曰國語伶州鳩謂太簇
所以金奏注云正聲爲商故爲金奏又景王將鑄
無射之鐘而州鳩以爲不可是亦必有說矣蓋黃
鐘一律 諸聲之本而太簇爲其商則是太簇之
止聲商也呂令西方其音商而無射者又窮秋之
律金氣之盛也三冬之樂旣去商調故於此二律
之起調畢曲者而并去之是亦求之聲音之理而

可通者卽以本經之文爲据可矣

前文奏太簇以祭一元奏無射以享先祖何也曰
前文言歌奏而不言其所爲之調則知是其一調
也既而其爲一調則陰陽相宣高下相濟可以
無矣二樂者各自爲調者也各自爲調則其
一聲之起調畢曲者必獨盛而孤行是以避之也
且大武與分祭不同前者大武之樂用以享祖矣
而此宗廟之中乃舍武而用韶聖人於此必有精
意存焉其前後異調之間正可參伍之以求其說

爾

合辰之說謂氣候晷刻皆同信乎曰此据入氣之一日言耳故交子月之一日必與交丑月之一日同也交寅月之一日必與交亥月之一日同也其餘合辰無不皆然古以斗建合朔爲說者亦謂至此一日則止而移宮而日月遷次故指此以爲標識焉爾今旣天與歲差而此說不可用則當明其意焉可也

十二月之合氣候晷刻相似十二律之合則分

長短懸殊何也曰十二月之合其氣候晷刻則同矣然而陰陽之消長進退豈可同乎哉律也者寫陽氣之消長者也故亥則陽涸於外而寅則陽息於中蓋相應而相反雖相反而實相應者也故比而合之陰陽之道乃備發斂之氣乃和律之有合也又豈與天地不相似哉

十二聲之說何如曰十二聲者以聲論而形在其中也故謂侈弇厚薄之類爲器之形則可以高下陂險達微之類爲器之形則不可惟但以聲言之

則其制器以合之者自有小大長短厚薄侈弇之法。且其於諸器皆有以包之而不獨鐘制爲然矣。考工磬人章云。已上則摩其旁。已下則摩其端。已上聲太高也。故摩旁以薄之。已下聲太下也。故摩端以厚之。此則不獨鐘器之證。而國語云。鐘尚羽。琴瑟尚宮。磬尚角。匏竹尚制。蓋鐘聲洪大。故其器不當過於大而尚羽。其擊撞之節則亦不當過於大而尚羽也。琴瑟之聲細微。故其器不當過於細而尚宮。其搏拊之節則亦不當過於細而尚宮也。

磬聲和平而角音爲清濁之中故磬之制與夫高
夏之節貴得其平而尚角也匏竹者以人氣吹之
者也人聲之高下清濁本有裁制故匏竹之制與
夫吹之之節一唯以人聲爲之準則而已此又不
獨鐘器爲然且不獨制器爲然之證矣夫高下者
聲之所不能無者也故高聲正聲下聲非聲之病
也今專指其病而絕無一聲之得其正者則亦何
所據以爲齊量之準乎

磬師以下官名次第如何曰典同以聲律造樂器

自磬師至鐃師所掌皆是也故次於典同之後除
琴瑟爲升歌之用大師小師之職此外則金石音
之綱也故首以磬師鐘師竹匏土音之用也故次
以笙師鼓音之節也故終以鐃師也磬師兼教編
鐘編磬而官以磬名者蓋八音磬最難辨亦惟磬
音最中虞書夔之自言惟曰鑿石拊石又曰戛擊
鳴球搏拊琴瑟以詠那之詩曰既和且平依我磬
聲故八音之次金爲先者其聲鏗訇而大猶五聲
之先宮也審音之職石爲重者其聲清越

五聲之中也前眡瞭專擊頌磬笙磬亦此

鐘師雖以鐘名官然所掌者大鐘而非編鐘則次於磬師宜矣金石既調樂器從之笙師所掌竹匏土三器皆堂下之樂也專以笙名官者簫管雖重而笙之用廣自堂下之樂奏而與歌相終始故鐘磬繫之歌笙非他音之不應鐘磬以歌與笙爲主也鋪師主鼓而已而官以鋪名蓋必知鐘鋪之節而後可以命鼓人避鐘師之名故但舉鋪也就數者職掌先後名義輕重之間而古樂之

求

所以爲聖人之經也

